



Kamis, 24 Desember 2020

Ogen: Miha 5:2



Nubuat Ketubuhan Yesus



Betlehem menarik adi si eteh turi-turinna. Ku je me nai ikutken Rut bibina Naomi. Betlehem kuta kemulihen Naomi ras perbulangenna si enggo mate eme Si Elimelek. Radu ras dua anakna si ikut mate i negeri Moap eme Mahlon ras kilion. Betlehem ertina Rumah roti, tapi itadingken keluarga enda ndube sanga lit kelegon ijah. Untung mulih ia ku Betlehem sebab labo lit idatna serpang pulah i Moab. Kematen ngenca si inanamina. Mulih ku Betlehem me benana Rut jadi nini tudung Jesus. Sabab arah perjabun Rut ras Boas me kari tubuh Obet bapa Isai. Isai eme bapa Daud. Emaka kuta kemulihen Daud eme Betlehem. Kalak enda suku Juda janah Maria ras Jusup Bapa Jesus eme suku Juda. Erdandaken sie maka la ateta mamang sanga i ban Kaisar Agustus sensus mulih Jusup ras Maria ku kuta kemulihenna Betlehem sebab ia suku Juda sinursur Daud, Isai, Obet, Boas ras Rut.

Lain nge kerina si nuratken kerna turi-turin enda tapi sada kiniersan si radu ngkuhi kerina turi-turin enda. Bage me luar biasana Pustaka Si Badia. Bagi ogenta sendah ija Nabi Mika enggo nubuatkena kerna ketubuhen Jesus ratusan tahun sope Ia tubuh.

I bas Betlehem si ertina Rumah Roti ndai, ije me tubuh Raja Penampat si kenca kari IA mbelin janah erdahin nina "Aku me Roti Kegeluhen." Roti labo pangan-pangan (snack) man kalak Jahudi tapi roti eme pangan pokok. Seri ras nakan man banta. Enda me sireh ku doni enda, si tubuh man banta, jadi Tuhan ras juruselamat si iperingeti kita ibas malam natal, i bas kerehenNa ku doni enda.

Bageme Miha nai enggo erbahan nubuatan si igenepina 2000 tahunen si lepas dengen seh jamanta enda tetap sialoken jadi penebusta. Peringeten ketubuhenna jadi keriahen simbelin man doni enda.